

**Euskal Autonomia Erkidegoko Poliziaren  
Kontrol eta Gardentasun Batzordea**  
**Comisión de Control y Transparencia de la  
Policía del País Vasco**

## EUSKAL AUTONOMIA ERKIDEGOKO POLIZIAREN KONTROL ETA GARDENTASUN BATZORDEA

*1/2020 LEGEGINTZAKO DEKRETUA, uztailaren 22koa, Euskal Autonomia Erkidegoko Poliziaren  
Legearen testu bategina onartzen duena*

### **17. artikulua.– Sorrera eta eginkizunak.**

1.– Euskal Autonomia Erkidegoko Poliziaren Kontrol eta Gardentasun Batzordea sortzen da, **kide anitzeko organo gisa, zeinak autonomia funtzionala izango duen polizia-erakundeari eta** Eusko Jaurlaritzan segurtasunaren arloko eskumena daukan **sailari begira**. Horrela, **legitimitatea eta herritarren konfiantza indartu nahi dira, hau da, polizia-jardunaren gaineko kontrolen neutraltasunarekiko eta objektibotasunarekiko konfiantza**.

2.– Euskal Autonomia Erkidegoko Poliziaren Kontrol eta Gardentasun Batzordearen **eginkizunak** hauek dira:

a) Ertzaintzaren edo Udaltzaingoaren barruko jokabide edo jardunbideak **ikertzea**, 19.1 artikuluan adierazitako erakundeek hala eskatuta, baldin eta **eskubideak urratzeagatiko kexaren bat** jaso bada, edo bestelako kexaren bat, eta horrek **benetako kezka sortzen badu, herritarren konfiantza kaltetu dezakeelako**.

b) Gorabehera hauek **ofizioz** eta nahitaez **ikertzea**: poliziaren esku-hartze edo operatiboen testuinguruan edo **polizia-zaintzak** dirauen bitartean, **norbait hiltzea edo larriki lesionatzea**. Ertzaintzak edo Udaltzaingoak, nahitaez, berehala jakinarazi beharko diote batzordeari zer gertatu den.

c) Aurreko eginkizunak gauzatzeko egindako ikerketak ikusita, **jardunbide onak gomendatzea**, poliziaren kode deontologikoarekin bat ez datozen **jokabide-patroiak edo jardunbideak identifikatzea**, eta **neurri zuzentzaileak edo prebentziozkoak proposatzea**.

## 18. artikulua.– Osaera.

1.– Euskal Autonomia Erkidegoko Poliziaren Kontrol eta Gardentasun Batzordea hauek osatuko dute: **batzordeburuak** eta Gobernu Kontseiluak izendatutako **beste bost lagunek**, Euskadiko Segurtasun Publikoaren Kontseiluak proposatuta. Horretarako, **emakumeen eta gizonen presentzia paritarioaren** printzipioa beteko da, eta hautatuek prestigio aitortua, sinesgarritasuna eta esperientzia izan beharko dute segurtasun publikoaren arloan, zuzenbidean, soziologian, medikuntzan, psikologian, etikan eta antzeko arloetan.

Kideen **herenak** izango dira **Euskal Autonomia Erkidegoko poliziaren** eskaletan eta kategorietan egon diren eta orain dauden pertsonen artetik aukeratuak, eta, gutxienez, hamabost urteko esperientzia izan beharko dute kidegoan; kideen **beste herenak**, berriz, arlo horietan **prestigio akademiko** aitortua duten langileen artetik aukeratuko dira.

**Batzordeak berak hautatuko** du, **osoko bilkuran**, zer batzordekide izango den **batzordeburua**.

## 18. artikulua.– Osaera.

2.– Izendapena **bost urterako** izango da argitaratzen den egunetik aurrera. Izendapen hori bitan baino ezin izango da berritu, iraupen bereko denboraldietarako.

3.– Egoera hauetan baino ez dute kargua utziko: hilez gero; agintaldia amaituz gero; karguari idatziz uko eginez gero; abstentzio- eta isiltasun-eginbeharren ez-betetze larria izanez gero, epai irmo baten bidezko ezgaitze-deklarazioa izanez gero, edo dolozko delituagatiko kondena izanez gero epai irmo baten bidez.

4.– Batzordekideek **ez dute inolako lansaririk jasoko** euren lanen truke. Nolanahi ere, zerbitzu-arrazoiengatiko kalte-ordainak kobratu ahal izango dituzte.

5.– Euskal Autonomia Erkidegoko aurrekontu orokorretan partida espezifiko bat ezarriko da, batzordeak bere lanak egin ahal izateko behar bestekoa.

## 19. artikulua.– Ikerketak.

1.– Batzordeak **esku hartuko** du hala eskatzen badio Eusko Jaurlaritzan segurtasunaren arloko **eskumena daukan sailburuak**, dagokion **udal-agintaritzak** edo **Arartekoak**; eta lege honek **espresuki adierazitako kasuetan** baino ez du egingo **ofizioz**.

2.– Batzordekideek berek gauzatuko dute batzordearen jarduna, eta, hala behar bada, ikerketa jakin batzuk egiteko, funtzionarioen laguntza eskatu ahal izango dute zerbitzu-eginkizunetan. Kasu horietan, ez dute jaso beharko jatorri-destinoko agintedunek emandako agindurik.

3.– **Polizia-arduradunek batzordeari erraztu** beharko diote **bai polizia-instalazioetan sartzea, bai irispidean izatea polizia-etxeetako datuak, dokumentuak, datu-baseak eta bideo- eta audio-grabaketak, bai eta edozein polizia-fitxategi lortzea ere**.

Poliziako langile guztiak daude **behartuta** ikerketan **laguntzera**; horretarako, zitazioetara joan beharko dute, eta behar diren datuak eta informazioa eman. Alde horretatik, polizia-**azpiegitura edo -eraikin** orotarako **sarbidea mugagabea** izango da une oro eta alde zuzenetik jakinarazi gabe.

## 19. artikulua.– Ikerketak.

4.– Batzordeak ikertzen dituen egitateak lotuta badaude uneko **ikerketa penal edo diziplinazkoren** batekin, ikertu ahal izango da, baina **ikerketa horri loturik ez dauden edo ikerketa hori kaltetzen ez duten alderdiak soilik**. Batzordeak ikertzen dituen egitateak uneko ikerketa penalen batekoak badira, agintaritza judizial eskudunari jakinaraziko dio batzordeak berak, interferentziarik ez izateko, ez ikerketa penalean, ez jardunen erreserban.

Hala izanez gero, eginbide penaletako langile ikertuak ez daude behartuta batzordeari laguntzera; eta batzordeak kasuan diharduen agintaritza judizialaren onespena lortu beharko du kasuari lotutako administrazio-dokumentuak irispidean izan behar baditu edo ikuskapenen bat egin behar badu in situ.

5.– Edozein unetan, batzordeak, **irizten badu ez-zilegitasun penal edo administratiboren bat egon daitekeela, agintaritza eskudunari jakinaraziko dio.**

## 20. artikulua.– Txostenak.

**Ikerketa** horiek **amaituta**, batzordeak **txosten bat egingo du, non hau guztia jasoko baitu laburbilduta**: kasuaren gorabeherak; egindako jarduketak; polizia-jarduketaren zuzentasunaren ebaluazioa indarreko jardun-arau, -estandar, -prozedura eta -protokoloei jarraikiz, eta azpiko arazoen azterketa. Horrez gain, **gomendio bat ere idatziko du**, non, hala badagokio, **neurri zuzentzaileak, prebentziozkoak edo hobetzekoak proposatuko** baititu, gabeziei aurre egiteko edo hautemandako arazoak ez errepikatzeko.